



Ngapi omu no tjangesa ehampuruko lyomunona



Kutjangesa ehampuruko lyamunoge kwa kara nomulyo gomunene. Kabuke aka naka ku sansekera:

- ▶ Morwasinke ya karera nomulyo kutjangesa ehampuruko lyomunona
- ▶ Ngapi no tjangesa ehampuruko lyomunona
- ▶ Nompango domarudi gokulisiga-siga getjangeso ehampuruko
- ▶ Nompango dokutjangesa ehampuruko lyomunona va hampurukira ponze zononkwara
- ▶ Yinke no rugana nsene ono zumbanesa mbapira zomvharerwa zamunoge.

Kabuke aka kwa ka hamesera koVetagona 81 zomo-1963 Zetjangeso LyoMahampuruko, Nonkwara, Nomfa ntani kugwedako nomauzera gokusikiliramo gokutunda koUminisiteli woYinka yoMonda zoSiromo noVatundwayirongo.

Munona nkenye ogu va hampurukira moNamibia kuvhura kugwana mbapira zomvharerwa, nampili yikare asi vakurona vendi kapisi womvharerwa za Namibia.

Mulyo gwtjangeso lyehampuruko lyamunoge?

Nsene ehampuruko lyomunona vana li tjangesa, mukurona kumupa dokumente zopaveta ava tumbura asi mbapira zomvharerwa. Mbapira zomvharerwa kudivisa udimbwiliso wo munona, opo pankumoneka madina gomunona, ezuva lyehampuruko, evega lyehampuruko nomadina govakurona vendi navenye ndi gumwe tupu.

Nokonda Nomulyo gwtjangeso lyehampuruko lyamunoge:

- ▶ Ediveta lyaNamibia kwa tanta asi nkenye munona ga hepa kugwanana edina konyima zehampuruko. Mbapira zomvharerwa kuna kara yizo ntambo zokuhova mokugwana mpango ezi.
- ▶ Veta kwa tanta asi nkenye ogu mukurona kwa kara nositumbukira sokutjangesa ehampuruko lyamunwendi konyima tupu zehampuruko.
- ▶ Nsene vakurona womunona navenye womvharerwa za Namibia, umbangi naunye kuugwana pombapira zo mvharerwa zomunona.
- ▶ Pwa hana mbapira zomvharerwa zamunoge, ove no gwanekera nomaudigu gomanene mokutjangesa munoge kosure, kugwana uhaku ndi kuwapera komauwa gepangero. Munoge na hepa hena mbapira zomvharerwa ngoumbangi wonomvhura dendi mokuhamena konombunga domaudano gosure.
- ▶ Munoge na hepa mbapira zomvharerwa yipo nga gwanese ko efano lyomutwe lyosirongo apa nga gwanesa nomvhura 16. Wa hepa kukara nombapira zomvharerwa ntani nefano lyomutwe lyosirongo mokuvhura kugwana pasaporta, mokuvhura kuhorowora, kugwana mbapira zousingi ndi kukwara paveta. Munoge na hepa mbapira zomvharerwa mokuvhura kurugana yininke ngamoomu kupaturura kabuke kombanga ndi mokumukuta moyirugana.
- ▶ Etjangeso lyehampuruko kuvatera hena Epangero li dive asi vanona vangapi vana kara monomukunda dokulisiga-siga daNamibia. Yangesi kuvatera Epangero mokutokora asi yimaliwa yingapi na gu gwana nkenye mukunda mosirongo.

Ove wa hepa kukambadara moomu wa vhulira kutjangesa ehampuruko lyamunoge (nawa unene kuyirugana monda zomazuva 14 konyima zehampuruko). Munona nsene ana kuru, ngayi digopa unene mokugwana nodokumende dohepero (unenepo nsene vakurona vendi vana ka pirapo) moku ka gwana mbapira zehampuruko.

Sinzi sovanona ava va pira kutjangesa ndi vanona ava ava hulilire kutjangesa kuna kara vanonoa womanokarapamwe detu doruhepo. Kutjangesa ehampuruko lyamunoge kuna kara ntambo zimwe zokutunda momukunduruko gouhepwe.

Etjangeso lyehampuruko kwa kara mawoko-woko. Kapi ava futu ko yuma.



Nokonda ntazimwe na gwanena munoge mbapira zomvharerwa

1. Mokugwana maruganeno gouhaku ngwendi vendwatintiko
2. Mokugwana mauwa goyimaliva youkalinawa
3. Mokumutjangesa kosure
4. Mokugwana efano lyomutwe lyosirongo ndi pasaporta
5. Mokuza mononkwara dopaveta
6. Mokulihamesera momahoroworo gosirongo

Kuvhura o sikise mo sinzi soyininke eyi pwa hana mbapira zomvharerwa, nye kudigopa unene morwa mbapira zomvharerwa yizo a zi likida umbangi wokuzulilira, sihonena epupi nounamvharerwa.

Yinke mbapira zomvharerwa?

Mbapira zomvharerwa dokumende zopaveta au gava Uminisiteli woYinka yoMonda zoSirongo noVatundayirongo azi likida udimbwiliso womunona, ezuva lyehampuruko, evega lyehampuruko, ntani madina gomukurona gumwe ndi vakurona navenye.

Yinke efano lyosirongo?

Efano lyosirongo (ava tumbura hena asi ID) kuna kara dokumende zopaveta au gava Uminisiteli woYinka yoMonda zoSirongo noVatundayirongo, ezi azi likida udimbwiliso womuntu. Azo kwa kara nefano lyomutwe gomuntu. Apo kukara po mauzera gokuhamenya edina lyogo muntu, evaga nezuva lyehampuruko, ntani nomoradimbwiliso.

Munona nkenye ogu moNamibia ga hepa kukara nanayinye mbapira zomvharerwa nefano lyo-ID. Muntu kuvhura kurugana ehundiro lyokugwana kakarata ko-Id kutunda ponomvhura 16.

Ngapi no tjangesa ehampuruko lyamunoge?

Mulyo unene otjangese ehampuruko lyamunoge konyima tupu zehampuruko lyendi. Komavega gamwe ove kuvhura kutjangesera kospangero oku vana mu hampurukire munona. Nsene asi oso sipangero vana kamuhampurukira munona kapi asi gava mbatero/elikwamo lyangoso, wa hepa kutjangesa munoge komberewa zopopepi zopamukunda zoUminisiteli woYinka yoMonda zoSirongo noVatundwayirongo.

Kwa kara ko nongendeseso mbali dokutjangesa ehampuruko, kukwama asi siruwo sokusika kupi sina piti po kutunda kehampuruko lyomunona ogu ono kuruganena ehundiro. Wa hepa kuitura nodokumende dongandi, edi vana tumbura pepenuno 5. Nsene o gava mauzera nagenye aga gana hepwa, ove to gwana mbapira zomvharerwa zamunoge poopo.

Nayi gusa
siruwo yipo
ni pongaik
nodokumenta
edi nani hepa
mokutjangesa
ehampuruko
lyamunwange.
Kapi nina
kugazara
asi nani yi
rugana.

Nye azo kuna kara
mpango zomunona!
Munona nkenye
ogu ga hepa
kukbara nombapira
zomvharerwa konyima
tupu zehampuruko.
Eyi ngayi vatera
munona kugwana
makwafu meparu
lyendi. Kuna kara
situmbukira soge
ngomukurona
sokudivilisa asi o
tjangesa ehampuruko
lyamunoge. Aso kapisi
sininke sosidigu.



Nomuhanguro dokulisiga-siga detjangeso ehampuruko?

Nsene o tjangesa monda zomvhura zimwe zehampuruko lyomunona, etjangeso lyangoso kulitumbura asi “Ediviso lyEhampuruko”. Kuvhura hena kutjangesa munona konyima meparu, nsene ana gwanesa nomvhura dokupitakana pwazimwe. Alyo kulitumbura asi “Etjangeso IyoKuhulilira lyEhampuruko”. Mbapira zomvharerwa kukara zoozo zimwe tupu.

Wa hepa kukambadara kutjangesa munoge monda zomvhura zimwe. Morwa ove no hepa kugwanena munoge uhaku mosiruwo oso. Ayo hena ureru kutjangesa Ediviso lyEhampuruko kuditakana kutjangesa Etjangeso IyoKuhulilira lyEhampuruko.

Ngapi omu nani tjangesa munwange pehampuruko (ndi monda zomvhura zimwe zokuhova konyima zehampuruko lyomunona)?

Ove wa hepa kukwama ngendeseso zEdiviso Ehampuruko. Wa hepa kuditura nodokumenta edi dina kukwama ko:

- ▶ Umbangi wehampuruko (mbapira zomunona zosipangero)
- ▶ Efano lyomutwe lyene-lyene ndi evalipiko eli va nkondopeka/pameka ntani mbapira zomvharerwa zugumwe ndi vakurona navenye. Nsene asi ove munantundwayirongo nye kwa tunga moNamibia, wa hepa kuditura pasaporta zoge noperemeta zokukupulisira kukarerera moNamibia. Nawa unene nsene vakurona navenye vavalu va za kumwe, nsene kuvhura. Nsene mukurona gumwe ga dogoroka, wa hepa hena kuditura evalipiko lyombapira zonomfa va nkondopeka/pameka.
- ▶ Nsene vakurona womunona va likwara: Kuditura ko mbapira zene-zene zononkwara ndi evalipiko lyazo eli va nkondopeka/pameka ndi mbapira zefwatururo zina kutunda kwaforomani nsene vakurona kwa likwara paveta zopampo.

Munamberewa na ku vatera kuzwida Foromu zEdiviso Ehampuruko. Mulyo unene kuitura/kusimba yimbapira nayinye eyi va ku pere kospangero pehampuruko lyamunoge. Nsene wa zumbanessa nodokumente doge, wa hepa pomuhowo kurugana ehundiro komberewa zoge zoPamukunda zoUminisiteli woYinka yoMonda zoSirongo noVatundwayirongo yipo o di gwane, ntani nye no tjangesa ehampuruko lyamunoge. Nsene ove kuna kara noudigu ndi kapi wa kara nonodokumente dohepero, wa hepa kuza konomberewa oka uyunge nomunamberewa gomomberewa zoUminisiteli woYinka yoMonda zoSirongo noVatundwayirongo a ku pe ko magano.

Ngapi omu nani tjangesa munwange konyima zokugwanesa nomvhura dokupitakana pwazimwe?

Wa hepa kukwama ngendeseso zEtjangeso lyKuhulilira lyEhampuruko. Ove no hepa nodokumente doodo dokulifana nedii Divediso lyEhampuruko. Nsene kapi ono kara nombapira zamunoge zospangero kuvhura o ruganese mbapira zendi zekuhwo.

Nsene kapi ono kara nonodokumente, hepero unene kuhenya mukuronasuregosure zokuhova ga dimbilire munoge ndi foromani gomukunda gweni kuvhura avatere mokugava efwatururo lyopaganeso eli ava tumbura asi **affidavit** omu na gava mauzera gokuhamena ukurona noyidimbwiliso yomunona. Nsene kapi ono kuvhura kugava nodokumente dongandi, wa hepa kuitura ko nombangi mbali dina kara asi nomvhura dawo dapitakana ponomvhura ntano moukurona womunona di ka gave mauzera gokuhamena ukurona noyidimbwiliso yamunoge. Vakurona womunona navanye mouvali wawo kuvhura kukara nombangi nsene yosili kutupu ogu na vhura kugava mauzera gohepero.

Nsene to tjangesa ehampuruko lyomunona ana kara nonomvhura dokupitakana 14, Uminisiteli kuhundira asi o piture ogo munona komberewa va ka mu guse unyatero wononyara ngosilikidiso sonkarero zepopero.

MBAPIRA ZOSIPANGERO
(zomunona)

NDI
NSENE ETJANGESO
LYOKUHULILIRA

MBAPIRA ZEKUHW
(zomunona)

NTANI

MBAPIRA
ZOMVHARERWA
(zomukurona)

+
EFANO
LYOMUTWE
(zomukurona)

NDI
NSENE MUKURONA
KAPISI MUNAMIBIA

PASAPORTA
(zomukurona
gomutund-
wayirongo)

PEREMETA
(zokukara
moNamibia)

NTANI
NSENE VAKURONA
VA LIKWARA

UMBANGI
WONONKWARA
(mbapira zononkwara ndi
efwatururo lyokutunda
kompitilisili gopampo)

NDI
NSENE MUKURONA
GA DOGOROKA

MBAPIRA
ZONOMFA
(zomukurona)

Noaffidavit nomavalipiko va nkondopeka/pameka va yi fwaturura pepenuno 9.

Yilye na vhura kurugana ehundiro lyetjangeso ehampuruko?

Nkarero	Yilye na vhura kutjangesa ehampuruko?	Yinke fani zopombapira zomvharerwa zomunona?
NOFANI: Ngamoomu tupu guna kufwaturura muzaro ogu, munoge nava mu ruka fani zoge ndi fani zoguhwe. Kutanta asi fani zepefano lyoge lyomutwe ndi fani zepefano lyomutwe lyaguhwe za hepa kuliza kumwe nezi vana kuruka munona. Pehampuruko lyomunona nsene vana ku pe mbapira zomunona zosipangero, wa heap kudivilisa asi fani zina kara pefano lyoge lyomutwe ndi zezi zina kara pefano lyomutwe lyoguhwe zi lize kumwe nezi nazi kara pombapira zomunona zosipangero.		
Vakurona navenye mouvali wawo vana hara kutjangesa ehampuruko. Vakurona awo kwa likwara.	Mukurona nkenye ogu. Vakurona navenye kuvatjanga pombapira zomvharerwa. Vakurona va hepa kupitura mbapira zawo zononkwara.	Fani zovakurona ava va likwara. (Nsene vakurona kuruganesanofani dokulisiga, awo tava tokora asi fanike nava pa munwawo.)
Vakurona navenye mouvali wawo vana hara kutjangesa ehampuruko. Vakurona awo kapi va likwara.	Mukurona nkenye ogu. Guhya kumutjanga pombapira zomvharerwa nsene vakurona mouvali wawo vana yi pulisire. Guhya ga hepa kukara po, ndi a gave efwatururo lyopaganeso lina kulikida asi ana pulisire kumutjanga pombapira zomvharerwa.	Kuvhura kukara fani zomukurona nkenye ogu. Fani zoguhwe kuziruganesa tupu nsene age kumwe nozina womunona vana yi pulisire. Nsene kapisi yimo, fani tava ruganesa zozina.
Ozina ndi oguhwe vana hara kutjangesa ehampuruko. Vakurona kapi va likwara. Mukurona gumwe muzuni nye kapi ana kuhamena metjangeso lyomunona.	Ozina ndi oguhwe. Ozina kapi va hepa kugava mauzera gongandi gokuhamena guhyamunona nsene awo kapi va likwara.	Fani zomukurona ogu ana kutjangesa ehampuruko.

<p>Ozina ndi oguhwe vana hara kutjangesa ehampuruko. Mukurona gumwe ga dogoroka.</p>	<p>Mukurona ogu ana kara nomwenyo. Zina kapi ga hepa kugava mauzera gongandi gokuhamena guhyamunona nsene kapi va likwara. Wa hepa kuditura mbapira zonomfa zomukurona ogu ga dogoroka nsene kuna hara edina lyogu ga dogoroka li kare pombapira zomvharerwa. Edina lyomukurona ogu ga dogoroka kulitjanga pombapira zomvharerwa nsene mvharerwa yipo vana kuzigava rokuhova. Edina lyanakufa kapi ava li tura pomvharerwa momazuva gokonyima.</p>	<p>Nsene o gava mbapira zonomfa, fani zankeny ogu govakurona kuvhura kuziruganesa. Nsene kapi ono kara nombapira zonomfa, kuruganesa fani zomukurona ogu ana kutjangesa munona.</p>
<p>Kutupu mukurona ana kuperuka. Munona nsigwe. Mureli gomunona kuvhura kutjangesa ehampuruko.</p>	<p>Dokumente nkenye ezi zina kulikida udimbwiliso womunona nevega lyehampuruko. Eyi kuvhura kukara mafano gomutwe govakurona, nombapira domvharerwa nonombapira donomfa, ndi mbilive zokutunda kwaforomani, mukuronasure ndi mugavindunge gonesa.</p>	<p>Fani zomukurona nkenye ogu, ntudi nsene pa kara mapukururo gokugwanena gana kulikida malitundakano.</p>
<p>Kutupu vakurona vana kuperuka. Munona nsigwe. Vanona kuvhura kutjangesa mahampuruko gavene nsene vana kuru.</p>	<p>Vantu vavalí va hepa kuza kumwe nomunona. Vantu ava va hepa kuvhura kuyipameka asi munona kwa mu hampurukira moNamibia. Vantu ava vana kuvatera munona nawo va hepa kuvahampurukira moNamibia, va kara nefano lyomutwe lyaNamibia nokukara pausesu noukurona wonomvhura 5 kuitakana ogo munona vana kutjangesa.</p>	<p>Fani zomukurona nkenye ogu, ntudi nsene pa kara mapukururo gokugwanena gana kulikida malitundakano.</p>

Ose ogu
munona
tatu mu
ruku John
Kandere.
Kandere
fani
zotate.



Amesi fani zoge
Muronga. Twa
hepa kutjanga
fani zoge, ndi fani
zoguhayamunona.
Nsene tu tjanga
fani zopeke
apa pombapira
zosipangero, ove
ngo gwanekera
nomaudigu
pokutjangesa
ehampuruko
lyamunoge.

NODOKUMENTE DOKUPIRA PO

Ngapi nye nsene ame kutupu mbapira zomvharerwa ndi efano lyomutwe?

Nsene ove kutupu mbapira zomvharerwa wa hepa kulitjangesa pankedi zokupitira metjangeso lyokuhulilira lyehampuruko. Nsene ove kutupu efano lyomutwe nye wa kara nombapira zomvharerwa, wa hepa kuza komberewa zopopepi zoUmminisiteli woYinka yoMonda zoSirongo noVatundwayirongo va ka ku faneke. Ntani nye no vhura kutjangesa ehampuruko lyamunoge.

Ame na zumbanesa umbangi woku va hampukilire munwange. Kuvhura simpe ni tjangese munwange ndi?

Inh, kuvhura. Wa hepa kuza kosipangero kosara zomahampurukiro oku wa hampukilire munoge o ka gwane evalipiko lyoumbangi wehampuruko. Nsene kapi ono kuvhura kugwana umbangi wangoso, wa hepa kulikida umbangi nkenye ou wongandi wokudimbwilisia munona noku va mu hamprukira. Eyi kuvhura kukara simwe ndi yoyinzi poyo yina kukwama ko: mbapira zamunoge zekuho, efwatururo lyopaganeso lina kutunda komupitisili gopampo, ndi efwatururo lyopaganeso lyokutunda komuntu gopeke ngwendi mukuronasure gosure zokuhova ezi ga dimbilire munona ndi mugavindunge gonesa.

Mupitisili gopampo kuna kuninka nge ni fute yimaliva yoyinzi mokugwana efwatururo lyopaganeso. Yinke nani vhura kurugana?

Ove kuvhura o gwane efwatururo lyopaganeso komuntu peke, ngwendi mukuronasure goposure zokuhova apa ga dimbilire munona ndi mugavindunge gonesa ndi musita/muruti ogu ga kuhwire munoge.

Ngapi omu nani rugana EFWATURURO LYOPAGANESO?

Ove to rugana efwatururo lyopaganeso nombatero zaKomusara goMaganeso. Komusara goMaganeso kuvhura kumugwana konosasiyona dovaporosi, monombanga nokonomberewa dovanaveta. Mokurugana efwatururo lyopaganeso ove kuvhura kutjanga efwatururo nyamoge, ndi to ninki Komusara goMaganeso a tjange eyi no uyunga. Komusara makura ta ku ninki o gane asi eyi ono tanta yosili. Makura ta saina ndi o ture sididiliko ngwendi enyatero(nsene kapi wayidiva kusaina) kefwatururo olyo siruwo oso Komusara kuna kutara. Makura Komusara ta tura ko sitamba a nkondopeke asi aloyo kuna kara efwatururo lyopaganeso. Eyi yiyo nye ava tumbura asi efwatururo lyopaganeso.

Ngapi omu nani gwana EVALIPIKO LYOPANKONDOPEKO lyodokumente?

Evalipiko lyopankondopeko kuna kara nsene Komusara goMaganeso a tara kodokumente zene-zene makura ta gana asi evalipiko eli kwa lifana damu-damu nodokumente zene-zene. Komusara goMaganeso kuvhura kumugwana konosasiyona dovaporosi, monombanga nokonomberewa dovanaveta. Wa hepa kulikida Komusara dokumente zene-zene kumwe nevalipiko lyazo. Komusara ta tura sitamba pevalipiko a likide asi kuna kara efano lyene-lyene lyodokumente zene-zene. Kuvhura o rugane mavalipiko gopaganeso gonodokumente domulyo yipo o vhure kupungura nodokumente dene-dene mevega lyewa si vhulise kugendagura nado.

Ngapi omu no pungura nawa papopero mbapira zomvharerwa zamunoge?

Mbapira zomvharerwa zamunoge kuna kara dokumente zomulyo unene. Wa hepa kuzipungura mevega lyepopero. Kukara egano lyewa kurugana evalipiko lyazo lyopankondopeko, kuninkira nampo no zumbanesa zene-zene. Ove kuvhura nye o ruganese evalipiko olyo va nkondopeka moyipimpo yoyinzi omu ava pura mbapira zomvharerwa, kuitakana kusimba-simba mbapira zomvharerwa zene-zene.

Yinke no rugana nsene ono zumbanesa mbapira zomvharerwa zamunoge?

Nsene ono zumbanesa mbapira zomvharerwa zamunoge, kuvhura o rugane ehundiro lyokugwana evalipiko lyazo koUminisitieli woYinka yoMonda zoSirongo noVatundwayirongo. Kutameka momumvho 2010, mfuto zokupinganesa po mbapira zomvharerwa kuna kara N\$30. Erwameno Lyo Uminisitieli woYinka yoMonda zoSirongo noVatundwayirongo asi ngano o rugane ehundiro lyokupinganesera po mbapira zomvharerwa momukunda omu va hampukira munona KAPISI momukunda omu va tjangesera munona.

Vanona va hampurukira PONZE zononkwara

Vanona wovanzi moNamibia kwa va hampuruka vakurona ava va pira kulikwara. Nsene ove kapi wa likwara naguhya ndi zinyamunona, kwa kara ko nompango dongandi edi ava kwama nsene kuna kutjangesa ehampuruko lyomunona.

Apa kuna kara po malimbururo komapuro gamwe gokuhamena kutjangesa munona va hampurukira ponze zononkwara.

Vakurona (vareti) navenye va hepa kugava epulisiro mokutjangesa ehampuruko lyomunona va hampurukira ponze zononkwara ndi?

Hawe. Mukurona nkenye ogu kuvhura kutjangesa ehampuruko lyomunona ogu va hampurukira ponze zononkwara. Zinya ogu ana kutjangesa ehampuruko lyomunona goponze zononkwara KAPI ga hepa kugwana epulisiro lyaguhayamunona. Zinya ogu ana kutjangesa ehampuruko lyamunwendi kapi ga hepa kudivisa guhyamunona. Nsene zinyamunona kapi ana hara kugava mauzera nkenye aga gokuhamena guhyamunona, kutupu ogu nava vhura kutumbura ngoguhayamunona pombapira zomvharerwa zomunona. Mauzera gokuhamena guhyamunona kuvhura kugagweda ko komazuva gokonyima, munona ntani nye ngava vhura kumupa fani zoguhwe posiruwo sooso nsene zinyamunona ana yi pulisire. Kapi ava futu ko yongandi pokugweda ko mauzera aga. Nsene guhyamunona ga dogoroka, edina lyendi nokuvhura si kuligweda ko konyima zetjangeso lyokuhova.

Mpango ezi kwa kara moveta. Munamberewa nokuvhura si kusinika mukadi agave mauzera nkenye aga gokuhamena guhyamunona nsenemukadi kuna hara kutjangesa munwendi pofani zendii.

Fani ɣalye nava ruganesa nsene munona kwa mu hampurukira ponze zononkwara?

- (1) Nsene zinyamunona gelike ana kutjangesa ehampuruko lyomunona ano guhyamunona kapi vana mu tjanga pombapira zomvharerwa zomunona, munona va hepa nye kumupa fani zozina. Guhyamunona kutupu hepero zokugava epulisiro nsene zinyamunona ana hara kugava fani zendii kwamunwendi.
- (2) Nsene vakurona navenye mouvali wawo va va tumbura pombapira zomvharerwa, munona kuvhura kumupa fani zozina ndi zoguhwe. Munona kuvhura kugwana fani zoguhwe ntudi nsene navenye ozina noguhwe vana yi pulisire.

**Ame kapi twa likwara noguhyamunona, kapi hena
nina hara edina lyendi li kare pombapira zomvharerwa
zomunona, nye guhyamunona kuna kutanta asi edina
lyendi lya hepa kukara po pombapira zomvharerwa.**

Guhyamunona kapi ga kara nompango zopamwene zokumutjanga pombapira zomvharerwa. Veta kwa tanta asi age kuvhura kumutura pombapira zomvharerwa ntudi nepulisiro lyozinyamunona.

Yinke nayi horoka nsene vakurona womunona va likwara konyima zehampuruko lyomunona?

Etjangeso lyehampuruko kuvhura kulisinta nokulitjangesa ngwendi asi vakurona kwa likwere paveta apa va hampukire munona. Etjangeso lyomuhowo ngava li dongonona mo monompunguro depangero.

**Veta ezi zina kara po ngesi kutekura vakadi
novagara wokupira kukwara mokulisiga.**

**Eyi amesi kuna kara eninkiliromo lya
hana asi lyopadiveta lyoparudivharwa?**

Matekuro gamwe gokulisiga govazinya novaguhya kwa ga hungika komalisigo gawo gopansitwe. Zinyamunona yipo nga kara pehampuruko lyomunona, nye guhyamunona kuvhura a dire kukara po. Nampili ngoso, nompango dimwe domoveta kwa tunda kwanare, apa ya kere yidigu mokulikida asi yilye guhyamunona. Ntaantani ureru kuruganesa ekonakono lyongandi lyopauhaku (ava tumbura asi ekonakono lyo-DNA) mokudimburura guhyamunona montenta. Nsene guhyamunona kuvhura kulikida asi yige guhya, age kuvhura kupatañesa nokutanta asi ana kara nompango zokumutura pombapira zomvharerwa zomunona nampili ngano zinyamunona a yi nyoke. Nye veta va hepa kuzilimburukwa ngwendi moomu za kara dogoro noku nompanguro daNamibia ngadi tokore udigou.



Ame kwa tjangesere ehampuruko lyamunwange medina lyange morwa oguhwe kapi na va gwene. Kuvhura ngani gwede ko edina lyaguhwe konyima ndi?

Inh, ove kuvhura kugweda ko edina lyaguhymunona konyima zetjangeso lyokuhova nsene ana yi pulisire. Kapi ava futu ko yuma. Nye kapi to vhuru kugweda ko edina lyoguhwe mosiruwo sokonyima nsene awo va dogoroka.

Ekamo

EDIVISO LYEHAMPURUKO

Siruwoke	Pehampuruko lyomunona, ndi siruwo nkenye esi dogoro munona ana gwanesa mvhura zimwe
Kupi	Kosipangero oku va hampurukilire munoge, nsene kugava eruganeno lyangesi, ndi komberewa zopamukunda zoUminisiteli woYinka yoMonda zoSirongo noVatundwayirongo. Nompanguro dimwe daMangasitarata nado kutjangesa mahampuruko.

ETJANGESO EHAMPURUKO LYOKUHULILIRA

Siruwoke	Nkenye siruwo tupu konyima zokugwanesa munona mvhura zimwe
Kupi	Komberewa zopamukunda zoUminisiteli woYinka yoMonda zoSirongo noVatundwayirongo. <i>Etjangeso lyokuhulilira kapi ava li gava kosipangero nkenye esi.</i>

Mokugwana mberewa zopamukunda zoUminisiteli woYinka yoMonda zoSirongo noVatundwayirongo, gwanekera noUminisiteli ko-061-2922111.

YINKE YOKUVHURA KUPITURA KOMARUDI NAĞENYE GETJANGESO

1. Mbapira zospangero zamunoge (mbapira zekuhwo kuzitambura tupu ketjangeso lyokuhulilira nsene mbapira zospangero kutupu)
2. Efano lyomutwe nombapira zomvharerwa ndi pasaporta zagumwe ndi zovakurona navenye vavali
3. Nsene vakurona womunona va likwara: Mbapira zononkwara ndi efwatururo lina kutunda kwaforomani gomukunda nsene vakurona kwa likwara paveta zopampo



Nonkango: Christina Beninger, Dianne Hubbard naRachel Coomer

Epiruro: Lazarus Issala

Mafano: Nicky Marais

Efanekobuke: Perri Caplan

Enduruko: John Meinert Printing (Pty) Ltd

Mbatero zoymaliva: Dutch Ministry of Foreign Affairs, MDG3 Fund

Muhanesitjango: Gender Research & Advocacy Project, Legal Assistance Centre, 2011

Uminisiteli woYinka yoMonda zoSirongo noVatundayirongo kwa vaterere netotopo lyokabuke aka.

Kabuke aka kuvhura kukavalipika mawoko-woko koyitambo yerongo, sinene tupu vana divisa runone.

Etjangwa lyopaelectronic lyokabuke aka kuvhura kuligwana powebsaiti zo-LAC: www.lac.org.na

